

Origen vul engrondir ed adattar il chastè da Riom

■ (mc) Giovanni Netzer, il manader dal project cultural Origen, vul extender il temp da gieù e meglierar l'infrastructura da teater dal chastè da Riom. Per realisar questa finamira èn differentas midadas da la construcziun necessarias. Origen ha tschentà al circul da Surses la dumonda per in dretg da construcziun. Avant in onn ha il parura da la confederaziun *Moritz Leuenberger* avert uffizialmain il chastè da Riom sco emprima chasa da teater rumantscha. L'emprima stagiun da teater sin il chastè da Riom è stada in success. Il program ambizius cun la premiera d'ina opera da *Gion Antoni Derungs* ha survegnì bunas notas dal publicum e da las medias. La recepziun dal festival sco perla culturala dal chantun Grischun, la distincziun per las lavurs da construcziun e la surdada onorifica da l'anè Hans Reinhart a *Giovanni Netzer* dattan caparra per la qualitat da questa instituziun culturala. Il fatg che la regiun dal Grischun central ha concedì quest onn in credit da manaschi per las produziuns da Origen è stà in act singular che documentescha la confidenza vicendaivla.

Start per la stagiun d'Origen 07

La stad d'Origen 2007 cun in program extendì enturn il retg David ha gì in bun start. Quai documenteschan il grond dumber da visitaders e la critica posi-

tiva en ils meds da massa. Las preparativas ed ils exercizis per retg David en il chastè da Riom han dentant er demonstrà l'insufficienza dall'infrastructura actuala per pudair mantegnair in manaschi da teater ordinà. La murdenta fradaglia da l'entschatta fanadur ha prest rendì nunpussavla la lavur da provas.

Fundaziun Origen

Per pudair consolidar a mesa vista l'engrondiment e l'adattaziun dal chastè da Riom han ils respunsabels dal project Origen l'intenziun da crear ina fundaziun cun l'intent da realisar ina chasa da teater en l'intschess alpin e promover la lingua rumantscha. Cun questa Fundaziun Origen documenteschan ils respunsabels er lur intenziun da garantir durada e persistenza da questa instituziun culturala en il Grischun.

Irradiaziun internaziunala

La Fundaziun Origen vules realisar en il chastè da Riom ina chasa da teater cun irradiaziun internaziunala e cun in manaschi sur onn. Il manaschi da teater duai plinavant promover il svilup cultural, social ed economic da la regiun ed esser ina plattafurma d'exercizi e preschentaziun per personas indigenas engaschadas sin plaun cultural. Per pudair garantir in manaschi sur onn èn dentant differentas adattaziuns da la construcziun indispensablas.

Investiziuns da 4 milliuns

Il program da construcziun per possibilitar in manaschi extendì preveda da sanar ed isolar las palas e la tuor, da cumplettar l'infrastructura interna, da conservar ils mirs externs ed eventualmain da cumplettar ils indrezs en il liber. Ins quinta cun investiziuns da 3 fin 4 milliuns. Ins vul mantegnair e cumplettar la substanza istorica sco quai ch'ina reconstrucziun provisoria dal chastè (guarda foto) documentescha. Duida atenziun vul ins dar en connex cun la restauraziun a la colonia da tulauns che è s'establida en la viglia miraglia.

En dretg da construcziun

Per savair realisar las mesiras da construcziun ha la Fundaziun Origen tschentà al circul da Surses la dumonda da conceder in dretg da construcziun da minimal 25 onns per quest object istoric. Ina dumonda da sustegn finanziar n'han ils respunsabels betg tschentà damai ch'il circul e las vischnancas han gia concedì credits per las emprimas duas etappas ed èn er pronti da s'engaschar sur la regiun per finanziar il manaschi dal chastè. L'intendant Giovanni Netzer è optimist pertutgand la realisaziun da quest project singular che dettia blers impuls culturals ed economics a la regiun. Uschia haja Origen surdà quest onn incaricas per passa in milliun francs e realisà in grond program cultural.



Tenor ils plans da la Fundaziun Origen duai il chastè da Riom en sia furma actuala (sanester) vegnir reconstrui en sia furma originala (dretg).